

# Su Sulat ni Pablo tu nga Getaw

## COLOSAS

Mendadi kig lunsud Colosas kini, mibetang diag buid nu syudad Efeso, su gempantag syudad nu getaw Roma tu prubinsya Asia begudiin. (Sug Asia begudiin, nandaw iin su nasud Turkey.) Naa, su gendawan pa ni Pablo duuni pikumpungan nu nga sakup ni Kristu diag lunsud Colosas, laak kana' ni Pablo miditu megukit di Gempia Petenday tu nga getaw. Bisan kana'en mikpetindeg di pikumpungan dia, delendeman ni Pablo, daniin ketendanan megabang dinilan.

Naa si Epafra, iin su kaunutan nu pikumpungan dini Kristu dia Colosas. Duuni gendaw minateng si Epafra ditu syudad Roma tanda' pinikutan si Pablo. Inukiten dini Pablo su mipenggulaula nu nga mikpetuud dini Kristu dia pikumpungan ditu Colosas. Iini inukiten pu' duuni mikpetu'un dig balus dia Colosas. Piktun' nilan tu nga sakup dia pu' melaun dawig diwata megdapidapit dawi ketaas nilan, metaas pa di kilawan laak gembaba' pa di Megbebaya'. Subay ilani pektemuyen daw. Salabuuk di ngag diwata kia si Kristu daw. Kagina ma'antu daw, kana' ni Kristu dawi Megbebaya'. Di sinulaten kini, paingalan dun ni Pablo su ngag diwata kia, “su ngag diwata megbaya' di ngag duma muka' meglekaunutan dun.”

Su kedua' sayep nu nga mikpetu'un dig balus kia, subay dunutan nu nga sakup daw su palinta nu nga mekpetu'un kiin, adun pulu' megawen. Paingalan dun ni Pablo su saga palinta “betad nu kilawan.”

Di sinulaten kini piktun' sungkin ni Pablo pu' si Kristu, iin su tantu palas nu Megbebaya' maita' nu getaw. Iin dademai penganay Bata' nu Megbebaya', metaas pa dig launan binaalen. Piktun'enen dadema pu' su gasal nu Megbebaya' muka' sug dani Kristu, iin da tanan. Kedua'en, nda'i pantagen su kedunut sia dig betad kilawan. Subay si Kristu laaki pegbesaan ta, sumalig ita diniin adun megawen ita, sampay peksiba'an ta su pegbetaden ta tu samataw ta.

**1** <sup>1</sup>Naan si Pablo, puun tu mauya'an nu Megbebaya' peneliganu ni Kristu Isus, muka' si Timoteo su mimated dinita. <sup>2</sup>Puitan nami amu sulat, yamu nga getaw diag lunsud Colosas pinaas na nu Megbebaya' mbaal daniin piglegetawan. Meseligan damu dema kepetedan nami puun tu keksalabuuk ta dini Kristu.

Penenebiin nami, begayan amu nu Gama' ta Megbebaya' tulungen muka' pianan ginaa.

### Ki Kekpetuud muka' ki Kepetail nu nga Getaw Colosas

<sup>3</sup>Naa yamu, sa' penenebian nami amu, mekpaladpalad ami lelayun tu Megbebaya', su Gama' nu Kaunutan ta si Isukristu. <sup>4</sup>Iini mekpaladpalad ami dun, midengeg nami pu' mikpetuud amu dini Kristu Isus muka' mekpetail amu dig launan samasakup ta tu Megbebaya'. <sup>5</sup>Ki kekpetuud muka' kepetail niu, miksekat di pedetengen niu. Iin su pedetengen niu, duuni begay diniu mitagu' pa ditu gekbus langit. Daansama' midengeg niu ia sa' inukit diniu su metuud, sa'itada su Gempia Petenday. <sup>6</sup>Ki Gempia Petenday kini, mipelaktag diniu sampay di tibuukan benwa. Su nga mekpetuud dun, sigi ilan megdugang muka' penggulaulaan nilan su gempia maa' nug daniu, pu' pinggulaulaan niui melengas sikna midengeg niu su tulung nu Megbebaya' muka' misabut niu pu' tantu tulung. <sup>7</sup>Pisuunan amu dun ni Epafras, su petailen sama sesugu'en ta, meseligan pegwekilan ni Kristu pibian di gabangen dinami. <sup>8</sup>Inukiten dinami su kepetail niu di nga samasakup niu, puun tug Balakat nu Megbebaya'.

<sup>9</sup>Naa kagina ma'antu, sikna midengeg nami pu' mekpetuud amu muka' mekpetail amu di nga samasakup niu, penenebian nami amu lelayun. Penenebiin nami tu Megbebaya' pesuunen gupia diniu su mauya'anen baalen niu, sa'itada, begayen diniu sug launan gininisan tinawan muka' telisebutay puun tug Balakat nu Megbebaya'. <sup>10</sup>Ma'antu pegbetaden niu dayun su mauya'an nu Kaunutan ta, sug leliagen dun iin lelayun ma'nini', penggulaulaan niu su kelaun gempia, muka' megisegi sinuunan niu mekatag di Megbebaya'. <sup>11</sup>Penenebiin nami dadema, pepegenen gupia nu Megbebaya' su ginaa niu puun tu tampusan metaas ginuungen, adun metigel niu gusay su kelegenay niu, dunut leliagen amu dun, <sup>12</sup>muka' adun mekpaladpalad amu tu Gama' ta ditug langit, pu' bigayan amu niin mpeduma amu petengeday di tinagu' nu Megbebaya' di nga piglegetawanen, su mitagu' ditu gekbus langit. <sup>13</sup>Ginawen ita niin di medelem, sa'itada su keglekaunutan ni Satanas, muka' pisakup ita niin di keglekaunutan nug Bata'en petailenen gupia. <sup>14</sup>Pu' puun tu pinggulaula nu Bata'en, likat ita niin, pidasun ita niin di sala' ta.

### Su Gasal ni Kristu muka' su Pibaal nu Megbebaya' diniin

<sup>15</sup>Naa, kana' maita' su Megbebaya'. Si Kristu kini, iin su tantu palas nu Megbebaya' maita' nu getaw. Iin dademai panganay Bata' nu Megbebaya', metaas pa dig launan binaalen. <sup>16</sup>Pu' pibaal diniin nu Megbebaya' su tiba'an bitang di gekleb langit bu' lupa', su maita' muka' su ndi' maita', sug launan megbaya' di ngag diwata pia ta' gelalay dun, sa' meguit tug duma, sa' meglekaunutan, sa' meglegadi'. Binaal nu Megbebaya' su gekleb langit bu' lupa' pebian diniin. Iini mibaal dun, adun pegbesaan si Kristu nu tiba'an bitang. <sup>17</sup>Su nda' pa mbaalig launanen, daan nain.

Sikna mibaal nai tiba'anen, iini megbaya' dun. <sup>18</sup>Iin su Kaunutan nu pikumpungan nu sakupen ma'niin nu gulu meguit tug lawasen, muka' iin su puun nug begu ketubu' nilan, sampay sug bekna metubu' puli', adun iin laaki tampusan pegbesaan dig launanen. <sup>19</sup>Pu' pigdelendem nu Megbebaya', su gasalen muka' su gasal nug Bata'en, iin da tanan. <sup>20</sup>Mauya'an nu Megbebaya' peseksudenen diniin su tiba'an getaw di gekleb langit bu' lupa' pibian dini Kristu, adun mekesambat diniin sug launan getaw meksekat di kepatay ni Kristu ditu kurus.

<sup>21</sup>Naa yamu, begudiin melayu' amu gupia ditu Megbebaya'. Migbanta amu gupia diniin miksekat di melaat gulaula niu muka' melaat delendeman niu. <sup>22</sup>Dagid nandaw, pisambat amu nu Megbebaya' diniin pibian di tantu kepatay nug Bata'en, adun paindegen amu di gedapanen di nda'i melamug dun melaat. Muka' ndi' damu dema medangat, pu' mekesuun namu tantu. <sup>23</sup>Basta laak sumalig amu gusay diniin, sa'itada gempagen da gusayi kekpetuud niu muka' ndi' niu begay pelinen su pedetengen niu dig launan pinasad nu Megbebaya', su midengeg niu sa' pisuunan amu di Gempia Petenday pilaktag na tug liwenagan benwa. Muka' naan, si Pablo, iini tindu'u dun ni Kristu sesugu'enen, adun ukiten ku su Gempia Petenday.

### Sug Baalen ni Pablo

<sup>24</sup>Naa nandaw, naan, liliagu di gabang nu kelegenayu diniu, pu' megela' u mbianay su kelegenay tindu' ni Kristu mbianan ku saanan ku megabang dig lawasen, sa'itada su pikumpungan nu nga sakup ni Kristu. <sup>25</sup>Iini tindu'u dun nu Megbebaya' sesugu'enu nu pikumpungan nu sakup, pigwekilanu niin megabang diniu pebian di kepesuun ku gupia di talu' nu Megbebaya'. <sup>26</sup>Daansama' pigbuni nu Megbebaya' ki talu' kiin, iglud begudiin di nga getaw mingasal menumpat di tibuukan benwa. Nandaw biwasan na nu Megbebaya' di nga piglegetawanan. <sup>27</sup>Iini pigdelendem dun nu Megbebaya' buasanen di nga getawen sug daansama' igluden, adun pepiananen sug launan bansa getaw. Kinii metuud biwasanen, yamu nga kana' getaw Judea, pegbenwanan amu ni Kristu, guluganen mpeduma amu di kekpededengeg tu Megbebaya' ditug langit di nda'i tamanen. Nda'i titulu'an melengas pa dini! <sup>28</sup>Kaas megukit ami mekatag dini Kristu di tibuukan benwa. Pektitulu'en nami su nga getaw muka' pektikuken nami, gikteb nu tinawan nami, pu' adun, sa' mekaindeg ilan di gedapan nu Megbebaya', menggangeti kekesuun nu nga getaw suminalabuuk na dini Kristu. <sup>29</sup>Kiai piginuunganu dun gupia ni Kristu, kaas meksitugesu megukit, gikteb di megagau.

**2** <sup>1</sup>Ma'antu, pesuun ku diniu pu' mektegelu di kengimbaalu, adun mebangan ku amu muka' su nga sakup diag lunsud Laodicea, sampay sug launan sakup nda' siben mekaita' dinaan. <sup>2</sup>Iini mektegelu

dun, pu' adun meligeni kesalig niu gela' meksekat tu keksalabuuk niu, ki mekpuun pelum tu kekpinetailay niu. Mektegel dau dun dema pu' adun niu mesabut gela' muka' mesuunan niu tantu kig daansama' pigbuni nu Megbebaya', sa'itada kig biwasan na mekatag dini Kristu. <sup>3</sup>Pu' si Kristu, mekpesabut diniu launan tinawan muka' sinuunan, maa' nu gungsi' pekpuka' di pingegludan nug launan ga'us nu Megbebaya'.

<sup>4</sup>Kiin, tinalu'u dun diniu adun ndi' niu begay limbungan namu nu nga metau gupia membaalbaal, pia melengas gupiaig yaga nilan. <sup>5</sup>Pu' pia kini dau melayu', tagikulen ku amu gupia. Liliag dau dun dema, pu' midengegu miksyalabuuk amu tantu muka' mitembusan niu su kesalig niu dini Kristu.

### Gempia Peglengilaman nu nga Suminalabuuk dini Kristu

<sup>6</sup>Kaas yamu, subay pebentangan niuig betad niu di getaw suminalabuuk na dini Kristu Isus, pu' dinawat niu iin Kaunutan niu. <sup>7</sup>Baal niu lendasan niuig betad gayu, meksidalemi gangeten adun tumulin. Pengma'nia damu dema, penggengeten niu dig delendeman niu sug bekna tinitulu' diniu ni Epafras mekatag dini Kristu. Pegisegay niu duni kekpetuud niu, muka' penemalay niu pekpeladpeladay su Megbebaya'.

<sup>8</sup>Naa peglengilam amu, tekaw duuni mekpalin dig delendeman niu pebian di tinawan kinilawan muka' pebian di pimbaalbaal titulu'an nda'i gatagen, adun pegbia'an amu dayun. Kiin, puun laak tug betad kinilawan pingumbilin di nga getaw muka' puun tu nga ndi' maita' melaatig betaden, kana' puun tu metuud mekatag dini Kristu. <sup>9</sup>Pu' si Kristu, sa' miksibaluy getaw, maita' diniin su tibuuk gasal nug Diwata Megbebaya'. <sup>10</sup>Muka' migela' dadema mengganget diniu su tantu ketubu' puun tu keksalabuuk niu diniin, su megbaya' dig launan meglekaunutan, sa' maita', sa' ndi' maita'.

<sup>11</sup>Naa yamu, kagina miksyalabuuk namu diniin, gitungan dun sinirkunsisu amu.<sup>a</sup> Ki kesirkunsisu kini, kana' puun di getaw, segaga puun dini Kristu, pu' inawa'en su tibuuk melaat gasal niu, adun kana' nai melaat gayak niui megbaya' di ginaa niu. <sup>12</sup>Pu' su kekpebunag niu tubig, lepeng miksaliunung amu di kepatay ni Kristu muka' di kelebeng dun. Sa' ginawen amu dayun dia tubig, lepeng mipeduma amu di ketubu'en puli', puun tu kesalig niu di kuleg nu ginuung nu Megbebaya', su mikpetubu' dun. <sup>13</sup>Bekna minggulaula amu melaat muka' kana' amu getaw Judea, sa'itada kana' amu sakup nu Megbebaya'. Kaas pimilang nu Megbebaya'

---

<sup>a</sup> 2:11 Sug betad sirkunsisu, tinitulu' nu Megbebaya' tu nga getaw Judea. Su gembata' laki, sa' walu endaw genat di kegetawen, tebia' tuli'en, pu' guluganen, tu'us pu' getaw Judea, sa'itada getaw mektamuy tu Megbebaya'.

su ginaa niu minatay na. Laak dagid pia ma'antu, piduma amu nu Megbebaya' di ketubu' puli' ni Kristu. Pu' pidasun ita niin dig launan melaat gulaula ta, <sup>14</sup>ma'niin iknasanen na su sinulat tanda' misulat pu' subay gela'en ta dunutay su nga Palinta, kaas mukuman ita dun. Gila'en pengua'ay su sinulat kiin, pu' su kepatay ni Kristu, ma'niin linansang su sinulat ditu kurus. <sup>15</sup>Su kepatay ni Kristu, dinaag dadema nu Megbebaya' su nga megbaya' muka' meglekaunutan di ngag duma nilan ndi' maita', pu' ilan, penenggi'an dun, ilani midaapen di gubat, iini mikedaag dun. Lelayunen ilan dayun pegegakay megbukayang di ngag launan getaw.

<sup>16</sup>Kaas, adini megdena' diniu mekatag di ma'aan niu muka' mainum niu, sa' di nga gendaw pegbesaan, pia galep, sa' Gendaw Pelali, petuyang niu ilan. <sup>17</sup>Kig launan titulu'an kia, begudiin mibaal laak tu'us nu pedetengen nu nga getaw Judea. Naa, ki pedetengen nilan kiin, minateng na. Iin si Kristu. <sup>18</sup>Petuyang da niu dema adin su getaw megdena' diniu, laungen dun subay pebeba'en ta laak dawig lawas ta muka' pektemuyen ta daw su nga sesugu'en nu Megbebaya' getaw langit. Petuyangen niu, pu' laungen dun, su titulu'anen, mikpuun daw tu kepenilungen tu pinita' diniin daw nu Megbebaya'. Petuyangen da niu dema pu' mikpelabawlabaw pagid di nda'i pantagen saba' nug delendemanen kinilawan. <sup>19</sup>Petuyangen na niu pa pagid su kesuayen dini Kristu, su mekpaiseg di kesalig muka' di keksalabuuk nu pikumpulan nu nga sakupen, mekatag di mauya'an nu Megbebaya'. Pu' si Kristui Gulu megbaya' di ketulin nug lawas, pitibuuk nug lelengu'anen muka' gugaten. Muka' su pikumpulan nu nga sakupenig lawasen kiin.

### **Ndi' Mpia Dunutanig Betad Kilawan Tautau Mekesuun**

<sup>20-21</sup>Naa, miksalabuuk amu dini Kristu, lepeng mipeduma amu diniin matay. Nda' naig labet niu dig betad kinilawan. Kaas ndi' na niu kambat petuuden sug betad nu kilawan, sug betad puun tu nga ndi' maita', su kektalenten gupia di ndi' mpia mbianan, di ndi' ma'aan sampay su ndi' mpuleg. Mauma dema mauya'an niu petuuden su ngag betad ma'nia? <sup>22</sup>Ki kelaun ndi' mpia mbianan, ndi' ma'aan muka' ndi' mpuleg, mpupus sa' mpenggulaula na. Kiaig betad muka' titulu'an binaal laak nu kilawan. <sup>23</sup>Laung dun nu getaw pu' melengas daw gupiaig betad ma'nia, pu' menamal mektamuy pebian di tegel nu kilawan mekpebaba' dig lawasen, sampay mekpetukung dig lawasen. Sinangkali' pa tanan, su ngag betad kia, nda'i pantagen megbaya' di melaat gayak, pia maika'.

### **Iin sungkini Gempia Dunutan, sug Diniwata**

**3** <sup>1</sup>Kaas penemalay niu talentenay sungkin sug betad ditug langit tanda' pegingkud si Kristu, pu' lepeng mipeduma amu dini Kristu petubu'en puli', pu' mipeduunan namu di ketubu' nda'i tamanen.

Pegingkud si Kristu dia gupid nu Megbebaya', pegbesaan gupia. <sup>2</sup>Kaas, pektalentenay niu gusay sug betad ditug langit, kana' nug dinig lumbang. <sup>3</sup>Pu' lepeng minatay namu, kaas mibeleng na sug betad niu kinilawan. Maa' nu ketubu' nemun ni Kristu ndi' maita', ndi' dadema maita'i ketubu' niu nda'i tamanen miksekat di keksalabuuk niu ditu Megbebaya'. <sup>4</sup>Sa' mpuli' dini si Kristu, sa' medayag nain, su mikpetubu' diniu ketubu' nda'i tamanen, mpeduma amu dayun diniin sampay di kepaita' di kelengas nu pegbaya'en muka' di kegedengegen.

### Sug Begu Betad batul nug Daan

<sup>5</sup>Naa mendadi, ki gayak nu kekinilawan niu, subay teliudan niu. Ndi' amu megdusa, ndi' amu menggulaula melaat, ndi' amu megdupang, ndi' amu mayak tu melaat, sampay ndi' amu pagid mesaku. Pu' sa' mesaku amu, mesama amu di getaw pektemuyeneni nga pimetang, sabaya' nu Megbebaya'. <sup>6</sup>Saba' nu nga gulaula kia, duuni gendaw pelebu'an pa nu Megbebaya' su ngag launan getaw memilas diniin. <sup>7</sup>Yamu dema, ma'niaig daansama' pigbetad niu, su kemilas niu pa tu Megbebaya'.

<sup>8</sup>Naa nandaw, subay belengen niu kig launan betad ma'nini', ndi' amu mangit muka' ndi' amu sempaun, ndi' amu megbanta muka' ndi' amu menlibak, sampay ndi' amu meglaat talu' muka' <sup>9</sup>ndi' amu megbebelusay. Iini ndi' amu menggulaula dun, pu' tiliudan na niu sug daan delendeman niu sampay sug daan betad niu. <sup>10</sup>Tilima' niu sungkinig begu betad niu. Miwat dun su Megbebaya' muka' pegisegenen gusayig begu betad niu sampay menggangeti gasal nu Megbebaya' diniu, adun sumambat amu diniin tantu. <sup>11</sup>Kaas su gasal getaw Judea sa' su gasal kana' getaw Judea, sa' su misirkunsisu sa' su nda' mesirkunsisu, sa' lain getaw, sa' ginuranti, sa' gulipen, sa' su kana' gulipen, launanen kini, nda' nai pantagen tantu. Iin laak gembageli pantagen, si Kristu, pu' iini tampusan metaas di gekleb langit bu' lupa'.

<sup>12</sup>Mendadi, subay gempiai pegbetaden niu, pu' sakup namu nu Megbebaya', pimili' amu niin daniin nga piglegetawan muka' petailen amu niin. Kaas subay melilelaaten amu, mekesuun amu, pebaba' niuig lawas niu, mesumaya' amu, metau amu mektigel dig dupangan muka' sayep nug duma niu, <sup>13</sup>sampay pedesunen niuig duma niu mikesala' diniu. Subay pedesunen niuig duma niu maa' nu kepedasun diniu nu Kaunutan ta si Isukristu. <sup>14</sup>Taman talu'u diniu, pekpinetailay amu, pu' su keksalabuuk ta nu nga sakup ni Kristu Isus, miksekat dadema di kepetail ta.

<sup>15</sup>Bigay pa pagid diniu ni Kristu pianan ginaa. Subay meguit gusay dig delendeman niu ki gempia ginaa niu. Pu' iini inggat amu dun mbaal salabuuk laak pikumpungan gitungan dun salabuuk damu lawas, pu' adun saladua' diniu, meksalabuuk tug dumanen di ginaa.

Muka' pekpaladpalad amu lelayun tu Megbebaya'. <sup>16</sup>Ki ginukit ni Kristu, subay mengganget dig delendeman niu. Pektitulu'ay amu muka' pektikukay amu, gikteb nu tinawan niu. Penalay niu su Megbebaya' dig bebat. Bebaten niu dadema su ngag Bebat sinulat di Misulat Talu' nu Megbebaya', sampay pia ta' bebatay duni pedelendem diniu nug Balakat nu Megbebaya', selian niu mekpaladpalad diniin.<sup>b</sup>

<sup>17</sup>Kaas, pia ta' alanduni penggulaulaan niu, sa' baalen, sa' telu'en, subay penggulaulaan niu bantang tu nga getaw pigwekilan gusay nu Kaunutan ta si Isus, lamug niu mekpaladpalad tu Gama' ta Megbebaya' miksekat di keksalabuuk niu dini Isus.

### Gempia Pegbetaden diag Balay

<sup>18</sup>Naa, yamu ngag libun misuay na, diadia mekpetuud ditu sawanen, pu' iinig bantang gulaula nu nga sakup ni Kristu.

<sup>19</sup>Yamu ngag laki pelum migawid na duayan, diadia petailenen su sawanen, kana' metegasi keguiten dun.

<sup>20</sup>Yamu nga gembata', kagina suminalabuuk namu dini Kristu, pekpetuud amu lelayun tu mekegulang niu mekatag dig launan mauya'an nilan, pu' iini leliagen dun su Kaunutan.

<sup>21</sup>Yamu nga gama' pelum, ndi' niu pelebiay titulu'ay sug bata' niu, tekaw buus lumukas ilan mekpetuud diniu.

<sup>22</sup>Naa yamu nga gulipen, pekpetuud amu tu gegalen niu dinig lumbang mekatag dig launan sugu'an nilan diniu. Petuuday niu ilan lelayun, ndi' mpia sa' petuuden niu laak saanan nilan megbantay diniu. Kana' dadema mpia sa' petuuden niu laak di kekpa'ita' niu dinilan, segaga petuuden niu di ndi' megdua'dua'ig delendeman niu, meksekat di kegbasa niu tu Kaunutan. <sup>23</sup>Pia ta' alandunig baalen niu, gikteben laaki ginaa niu, gitungan dun gegalen niu su Kaunutan ta si Isus, kana' nu getaw. <sup>24</sup>Pu' ndi' niu selingaway pu' su Kaunutani sumugda diniu, sugda diniu su pinasad na nu Megbebaya'. Pu' su tantu gegalen niu su Kaunutan, si Kristu. <sup>25</sup>Laak, sugdaan su menggulaula melaat lepeng dig baalenen, pu' su Megbebaya', nda'ig lingken ukumenen.

**4** <sup>1</sup>Yamu nga gegalen, peglepeng niu su kepia niu tu nga gulipen niu, muka' peksemaan su nga pemegay niu dinilan. Ndi' niu selingaway pu' duun dademai gegalen niu, su Kaunutan ta ditug langit.

### Nga Titulu'

<sup>2</sup>Naa launan niu, penamal amu menenabi. Selian niu menenabi, peglengilam amu, muka' pekpaladpalad amu tu Megbebaya', <sup>3</sup>sampay

<sup>b</sup> 3:16 Kig Bebat kini, iin su piningalan dun nu getaw Judea begudiin Salmo, sug bibat nilan adun pektamuy tug Diwata.

mpeduma niau penenebiay dadema. Penenebiay niu tu Megbebaya' begayanu niin sikawan ku megukit, adun maukitu su petenday mekatag dini Kristu daansama' pigbuni, muka' mibuasan na, pu' kiai mipikutanu dun. <sup>4</sup>Penenebiay niau adun mpanteku ukitay su melaun getaw, pu' ndi' mesu'at sa' ndi'u megukit dinilan.

<sup>5</sup>Naa, ki nga nda' pa sakup dini Kristu, peksiba'ay niu su pegbetaden niu dinilan, gebii gendaw, gikteb tu sikawan niu, pepianay niu ilan. <sup>6</sup>Pelengas niu lelayun sug yaga niu dinilan muka' peleliagay niu ilan, adun metau amu sumbag dig launan getaw sumaak diniu mekatag di kekpetuud niu.

### Simbayan ni Pablo su nga Samasakupen

<sup>7</sup>Naa sug launan mipenggulaulau, megukit dun diniu si Tiquico, su mimated dinita petailen ku gupia. Meseligan iin lumimbang dinaan, sama sesugu'en ku di pibaal dinami nu Kaunutan. <sup>8</sup>Iini sinugu'u dun mangay dia niu, adun pesuunen diniu su nga mipenggulaula nami, launan nami, adun mawa' su kelibuleng niu dinami. <sup>9</sup>Petendugen ku diniin si Onesimo, kig duma niu kiin. Petailen ku dadema iin, meseligan mimated dinita. Ukitan amu nilan dua' mekatag dig launan mipenggulaula nami dini.

<sup>10</sup>Naa si Aristarco, sama pirisuu, sinambay amu niin. Si Marcos tinindegay ni Bernabe, sinambay damu dema niin. (Mabu' midawat na niu su tinitulu'u diniu mekatag diniin pu' penemba'en niu iin sa' mekeditu niu.) <sup>11</sup>Si Josue, sala ngalanen si Justo, sinambay damu dema niin. Nda'ig lain getaw Judea samasakup ta megabang dinaan megukit mekatag di Keglekaunutan nu Megbebaya', ki telu ilan kia. Gembageli gabang nilan dinaan.

<sup>12</sup>Naa si Epafras, sala pa di ngag duma niu dini, sesugu'en ni Kristu Isus, sinambay damu niin. Gebii gendaw, pinemalan amu niin penenebiay adun meligeni kesalig niu, muka' adun metuudan amu dun gupia su tiba'an mauya'an nu Megbebaya'. <sup>13</sup>Pu' misuunan ku pia ta' alandunig baalenen, adun ebangan amu niin, pinemalanan baalay. Pengma'antuunen dadema su nga samasakup niu ditug lunsud Laodicea muka' diag lunsud Hierapolis. <sup>14</sup>Naa si Lucas, su petailen nami memulung, muka' si Demas, sinambay damu dema nilan.

<sup>15</sup>Naa, su kepetedan ta diag lunsud Laodicea, sembayay niu ami dinilan sampay si Ninfa, ilan nu nga samasakup ta mekumpung diag balayen. <sup>16</sup>Sikna besaan niu di gedapan niu su sinulatu kini, kelelaat puit niu pelum tu pikumpungan diag Laodicea, adun besaan nilan dadema. Ma'antu, pegbesaay niu su sulatu piwitu tu nilan. <sup>17</sup>Muka' talu' niu dini Arquipo, "Subay tubusen mu su pibaal dini'a nu Kaunutan miktendu' dini'a."



<sup>18</sup>Naan si Pablo, sulaten ku dadema diniu gempia gendaw. Kelelaat, ndi' niau selingaway penenebiay, pu' pinikutan pau gusay sampay nemun.

Naa, penenebiin ku tu Megbebaya', mbianan niu su tulungen gebii gendaw.

Daal daitu.

*Pablo*